

# Prost Neijohr!

Prost Neijohr, hott de Karl mir omm Sunndaach außem Audo zugerufe unn iss weidergefahrn. Zwaa Stunn späder hotter mich oogerufe unn dess selwe noch emol gesaat: Prost Neijohr, Honnes.

Prost Neijohr, Karl, habb ich ze Antwort gewwe, ei wo bisde dann hie omm Neijohrdaach in aller Herrgottsfrieh? Wenn koon Stommdisch iss fährtde in de Geechend erum, was mächsde dann su frieh schunn unnerweechs?

Unn was lääfst du um neun Uhr schunn uff de Gass erum?, hotter mich gefroocht.

Ei waaßde, saach ich, de Schorsch unn ich, mir hadde omm zweide Weihnachtsfeierdaach driwwer geredd, dass nooch so emm Kalenner von de Mayas im nächsde Dezember die Welt unnergieht. Unn doo bin ich e bissi spaziern gonge, enunner onn de Moo, unn habb merr Gedonke driwwer gemacht. Unn wo bist du hiegefahrn?

Doo säter: Ei ich war omm Fluchhafe unn habb moin Nochber unn soi Fraa abgehollt, die warn iwwer die Feierdaach uff de Kanarische Insele. Saach emol, dess sinn doch alles Spinnereie mett dem Weltunnergong, odder?

Ich glaabs joo aach nitt, saach ich, awwer stell derr vor wenn im Dezember die Welt unnergieht, doo misst merr joo eichtlich schunn longsom iwwerleeche, was merr in dene paar Monat noch mächt, ich moon, dass merr villeicht die Zeit noch e bissi ausnutze det. Ach waaßde, moont de Karl, als merr e bissi jinger warn, hawwe merr gesunge: Omm dreißischsde Mai iss de Weltunnergong – unn die Welt iss aach nitt unnergonge.

Ja, saach ich, dess mettem Weltunnergong muss merr joo nitt glaawe. Awwer mir sinn doch aach ald genuch, dass uns was bassiern kennt unn dess wär aach enn Weltunnergong. Also denk ich, dess iss gar nitt so schlecht emol driwwer noochzedenke, wenn merr werklisch nor noch zeh, elf Monat ze lewe hätt, was merr dann noch mache kennt.

Also, moont de Karl, ich denk, wenn ich dess wisst mettem Weltunnergong, det ich merr noch e bissi was oogucke. Ich wollt immer mol mett de Fraa nooch Venedisch, dess iss aach nitt so weit unn doo gibt's scheene Reise dorthie. Unn dann noch enn Abstecher in die Toscana, die Londschaft dort, ich kennse joo nor von Bilder, gefällt merr so gut.

Ich saach: Mir dete gern onn die Ostsee fahrn, uff de Darß, unn dete dort enn Kurs mache unn dete ze mole oofonge. Bilder vom Meer, so Welle mett weiße Schaumkrone, die dete merr gern mole.

Moont de Karl: Waaßde Honnes, mir bleiwe halt gern in unserm ahle Trott, lese Zeitung, gucke Fernseh unn giehn zum Dokter, unn dann wunnern merr uns, wenn e Johr erum iss unn dann werrd gejommert, dass mir als älder werrn unn immer noch nitt in Venedisch warn

Unn ich saach: Unn dass merr immer noch nitt enn Molkurs uffem Darß gemacht hawwe. Unn warum?

Sät de Karl: Weil merr moone, mir dete ewisch lewe. Doo wär die Sach mett dem Weltunnergong garnitt so schlecht, doo käm ich nooch Venedisch unn du uff de Darß.

Ich saach: Ich guck moie mol im Internet, ob die Welt werklisch unnergieht, unn wenn, dann saach ich derr Bescheid unn dann buche merr Venedisch unn aach die Molerei.

Eiern Honnes